

C'est curieux cand min.me don, çà, les djins tapat leus sous à ène putite machine coume çà, et mi, on nu m'a vu pon d'ner pou z'ach'ter yène du mes cadjes. V'la k'ile anonce lu prumî d'may, wê, coume si on nu l'savot nin pm'às årmanakes.

E pi, il è sî su tch'min.

Tout d'in côp, il è atindu dins s'vinte, deux gârces ki cri.yint (ç'astot la fwim et la sè). Dins les deux, i gn'avot yène k'i plot contenter du côp, i n'avot k'à bwâre ou bî.

Mês, i n'ârot sû contanter la fwim; dins sa potche, i n'avot k'ène clé, su coutê et ène fâsse-ma.ye.

Il è falu k'i dîne co in côp par keûr.

Là-d'sus, il è n'nalé drèt d'vant lou, dins ène virée plin.ne du fêtchîres et là, il è vu ariver ène individu bin mètu.

Coume lu Gros avot fwim, i s'è moustré hardi è il è acosté l'ètranjer à li d'mandant du l'êdi in pô.

L'houme li è d'mandé: *Coumint ?*

A m'fujant la charité, dit-i l'Gros, Dj'ê fwim èt dju n'ê pon d'sous pou z'ach'ter à mwindjî.

E, cand tu m'è vu, t'es v'nu m' à d'mander ?

Lu Bon Diu vous l'rindrè, dit-i l'Gros.

A z'atindant câzer coume çà, lu bê Mossieu è fwê ène drole du grimace, à wêtant l'Gros d' traviêrs. I li è dit insi :

Tu n'è nin honteux ? ène oume plin d'fwâce coume t'ès, du burlander coume tu fwê à d'mandant la charité, à lieu du trava.yî pou viker.

A.y, dit-i l'Gros, çà s'rot avu plêji ku dju trava.y'ros, mês m' mustî nu m'fwê nin gan.gnî assez à trava.yant.

C'è k'tu fwês ?

Dju su ga.yolî, dit-i l'Gros, et tous les djoûs, dju gan.gne mwinsse anute k'èrsè.

Lu Mossieu avot l'êr du douter, mês l'Gros è aturpri de li èspliker l'afwêre, et à l'fin, l'houme l'è crû.

Alons,dit-i ou Gros, dju wès ku t' sint Patron, c'st Sint Bra.yoû, pa ç'ku t'es bin la maniée du t'plinde. E pisku tu n'sés vinde tes ga.yoles, dju va t'duner yâk ki bouch'rè les mwêjes djournées.

Là-d'sus, lu bê Mossieu choufule è ène ojê è volé vers lou. Il ére bleu, avu des ôtes couleûrs et il è v'nu s'rassîre su ène cadje.

L'oume l'è hapé, pî i l'è d'né ou Gros.

Vla pour ti, dju tu l'dène, et cand tu vôrès yôk, tu n'orè k'à dire : »Cabolé, fwê t'n'ovradje ! »

E l'oume è n'nalé.

D'ju vous vèy c'è k'çu n'n est du côp, k'i dit l'Gros, v'la 25 ans ku dju n'ê jamwês mwindjî à ma fwin. Cabolé, Fwê t'n'ovradje !

I n'avot nin fini d'câzer ku, s' la hy.êbe, i gn' avot à mwindjî pou dîje houmes.

Là-d'sus, il è volu r'mèrci.yî lu bê Mossieu k'astot djà lon. Il è couru après lou, mès l'Mossieu li è dit :

Mi, dju n'su nin Sint Pansâ, avu mi, on vike bin. Alê, mwindje è profite du l'ocâsion.

Cand il è yu fini d'câzer, on n' l'è pu vû.

Lu Gros s'è mètu à s'rupachi, et toutes les deux goulées, i cri.yot :

*Merci, là, Sint k'ça pu z'èsse, Merci !
Asteûre, dju vôros bin des ôtes ca.yèts. Cabolé, fwê t' n'ovradje !*

E, ossitot, il è vu un tas d'nûs ca.yèts à l'tère duvant lou. I gn'avot ène bèle culote, in bê mantê, in bê paltot, è ène bèle monte avu sa tchin.ne, pî i gn'avot co in bê tchfô avu des sounètes ki pindint à l'sèle.

Là d'sus, l'Gros è sté bin fièr, vous compurdèz, i wêtot pa drî lou. On z'ôrot dit in bådèt ki sa.yot d'vèy ses orèyes.

Il è sôté à tchfâ, après awè mètu l'ojê din ène bèle cadje, k'il è pindu après la sèle, et pî, en route !

Tà z'avançant, i choufлот coume in bouvreu il è arivé dins ène grande virée du gnêsses. Là, i gn'avot 4 agasses su ène putite boûle. I gn'avot yène ki djot âs ôtes :

Ma mère, ç'ère ène agasse, ma grand-mère, ç'ère ène agasse, la mère du ma grand-mère, ç'ère ène agasse, è mi, dju su toudis ène agasse.

Lu Gros n'è nin compris ç'ku ça vlot dîre.

Les 4 agasses ont volè ô lon, à sa drète. I n'n'è sté binâje, pasku cand il è vu les agasses, i n'astot pû si chûr du sa chance.

Tout l'monde sét, en Ardène, ku c'est riské, ku d' rascontrer des agasses su s'tchumin.

Pî, il è rêchu du l'virée à si.yant in pazê, il è fwêt troter su tchfâ, pî il è arivé duvant la cour d'in tchestê ki dominot in viadje. Justumint, ç'astot la dicâce à ç' viadje-là et les djins dansint d'vant les gri.yes du l'cour.

On z'y wé.yot des types du l'yôte futée, du yôte volée, des escros.. et co des ôtes.

Et, t'â dansant, tout ç'monde-là s'plindot bin fwârt. On v'not du v'nu dîre ku les musiciens d'mandés nu plint nin v'nu fwêre bal. Si on v'lot du l'musike, i fârot tchanter.

Lu Gros s'è informé et cand il è sù kwè, i s'è avançi è il è ofru ses services:

Si çà m'astot pèrmis, dju d'mandros pou remplacer ç'è ki manke.

Tout' chûte, ont-i dit les ôtes.

Cabolé, fwê t'n'ovradje !

E ossi vite, on z'è vu ariver des musiciens ki atchint la guète pou z'esse pu vite ou bal. I gn'avot des clarinètes, in tuba, des violons et in tambour.

Les danseus ont sté bin fièrs d'awè la musike.

Lu Sègneûr, lou, est sté tout sbaré d' vèy çà, il è sté tèt'mint binâje, k'il è dit ou Gros du prinde sa bwêchèle pou dansî avu.

On d'jot dins l'pa.yis, k'ile astot bèle coume lu djoû, fine coume in r'nôd, et lèdjîre à l'danse, coume ène lum'rète.

Lu Gros, à la wèyant, è pièrdu la tièsse in moumint, mès çà n'è nin dèré. La donzèle l'è trouvé coume i fât, ossi conv'nâbe ku les nobes û swa-dizants k'astint là.

Cand les danseûs ont c'maçi à z'esse odés, lu Cabolé è tchanté des bèles tchansons, à l'place du ga.yolí, pî il è fwêt des bagues et des bras'lèts, k'on z' d'nné às fames.

Tout l'monde astot tout pièrdu d' vèy çà, à c'minçi pâ sègneur, k'astot aradjî des 4 pates et du muzê. (Avare)

Cand il è yu ravisé l'ojê in moumint è vèy c'è k'çu n'n' astot, il è d'mandé ou ga.yolí pour l'ach'ter, k'i l'î fwêje loû min.me su prix.

Lu Gros è r'fusé.

Là-s'dus, Lu Sègneûr lî è proposé in tchestê, des tchamps, des virées, des bwès d'ta.yis è d'hiôt' futée, et co bin' ôte tchôse.

Lu Gros è co r'fusé.

Tu n'dumandes nin l'Paradis dju supôse ? k'i dit l'Sègneûr.

Non, mès dju d'mande la coumére ku dju dansos t'tà l'heûre avu.

Poukwè k' tu nu l' dijos nin tout d' chûte, dit-il l' Sègneûr. Dju cours tu la kê.

Il è don couru dlé la coumére, et i l'î è raconté l'martchî k'il avot fwêt avu l'ga.yolí.

Ça n'è nin plê d'trop à l'fame, mès ile è catchî s'djeu. Dins l'fond, ile astot binâje du rèsse libe, mès, coume toutes les fames bin'alvées, ile è fwêt la çê ki rèsistot.

A.yi,dit-ile, et si ç't'oume là astot in roûlî k'a vôrot à ma vîe ?

Dju t' dérê ène bou.tyê du roudje huile, ki guèrit les curnaches.

E si ç'astot in sorcî ?

Dju t' dérê ène brantche du paukî bèni.

E si ç'astot l'diâbe ?

Dju t' dérê in boket d'cièrje bèni l'djoû des Tchandèyes. E d'j'irê min.me pu lon, ma fille, si t'avos la fîve, tu sés bin coumint k'on fwêt. Lu çî k'è la fîve lêche tumer ène pîce du mounoye à l'place k'i gn'è 7 tchumins ki su r'jondat, è l'cî ki ramasse la pîce, ramasse la fîve avu. Dju t' dérê ène pîce du mounoye pou çà.

E, t't'à côzant, il avot amon.né la coumère dulé lu tchfâ du Gros, pî, i lî è dit insi:

Monte à tchfâ, dju va t'êdî, monte durî l'Gros.

Cand c'è sté fwêt, il è apougû la cadje avu l'ojê, pî il è r'couru ou tchestê ossi vite k'il è polu.

Cand il è rarivé, les invités nu câzint ku des mèrvèyes k'il avint vû.

Trankilisèz v', dit-i l'Sègneûr, à rintrant avu la cadje à l'mwin. Çu k' vous z-ô vû n'è rin dlé ç'ku z'alèz vèy ! Dju s'ré pu ritche ku lu Rwa. Vinèz d'lé mi è wètèz bin surtout.

A d'jant çà, i pôse la cadje su la tôle et i dit:

Crolé,fwêz t'n'ovradje ! (i v'no du s'tromper dins la formule. I d'vo dire :Cabolé)

I n'avot nin fini d'câzer k'à l'place du bleu ojê, i gn'avot pu k'in gros rousse grijâte ki l'wêtot pou l'narguer.A d'nant in còp d'bêch', l'uche du l'cadje s'è drovu, l'ojê è volé vòy à passant pa l'vite.

A passant pou cârô, il è cri.yî: « Coucou,coucou ! »

E c'è d'puis adon k'on dit:

Les çîs k'atindat tchanter l'coucou pou l'prêmî còp d' l' anée, âront des sous jusk' à l'fin, si n'nont à leu potche, cand l'ojê tchante, et à condiçion du fwêre ossitot lu cumulèt

E v'la l'histwâre du ga.yolí et du coucou, ki n'è pu jamwês sté bleu..

Gaston LUCY

Ki dit ku l'Gros n'è nin gan.gnî ou tchandje !